

Inatsisartut Suleriaasianni § 33, imm. 3, nr. 1 naapertorlugu Nunat Avannarliit Killiit Siunnersuisoqatigiiffianni Inatsisartut aallartitaasa siulittaasuata Josef Motzfeldtip aalajangiiffisassatut siunnersuut manna saqqummiuppa:

Nunat Avannarliit Killiit Siunnersuisoqatigiiffiata kaammattuutitut aalajangersagaanik nr. 2/2011-mik, ataani allassimasut oqaasertalimmik, Inatsisartut tapersiinissaannik Inatsisartut aalajangiiffisassaattut siunnersuut:

Nunat Avannarliit Killiit Siunnersuisoqatigiiffiata nunani avannarlerni killerni kulturimut naalakkersuisut kaammattorpai filmiliorneq tv-kkullu aallakaatitassiorneq eqqarsaatigalugu nunat avannarliit killiit suleqatigiinnerata annertusarneqarnissaanut periarfissat misisoqqullugit. Alloriarnertut siullertut immaqa ataatsimiititsisoqarsinnaagaluarpoq nunani avannarlerni killerni filmiliornermik tv-kkullu aallakaatitassiornermik ingerlataqartunit peqataaffigineqartumik.

Akissuteqaat

(Ilaqutariinnermut, Kultureqarnermut, Ilageeqarnermut Naligiissitaanermullu Naalakkersuisoq)

Siullermeerneqarnera

Naalakkersuisut siunnersummut qujapput, isumaqataalluinnarlutillu nunat avannarliit killiit akornanni filmiliornikkut tv-kkullu aallakaatitassiornikkut annertusisamik suleqatigiinnerup kulturikkut suleqatigiinneq nukittorsarsinnaassagaa.

Siunnersuut KNR-imi tusarniaassutigineqarnikuvoq, taassumalu taperserpaa, nunat pingasuuusut naalakkersuisisa filmiliorneq aamma tv-kkut aallakaatitassiorneq pillugu suleqatigiinneq aallartinniarmassuk, ataatsimeersuartitsiniarlutillu filmiliornermik aamma tv-liornermik Islandimi, Savalimmiuni aamma Kalaallit Nunaanni suliffeqarfinneersunit peqataaffigineqartumit.

Sanilliussassatut KNR-imit innersuussutigineqarput peqataanermi misilitakkat pitsasut qanittukkut ataatsimeersuarnermi ingerlanneqaqqammersumi, taannalu ‘The World Indigenous Television Broadcasters Network’ (WITBN)-imit ukiut allortarlugit ingerlanneqartarpoq.

WITBN sulivoq nunap inoqqaavisa oqaasii kulturallu nukittorsarniarlugit tv-kkoortillugit, isiginnaartartut qassiuneri amerlisittarnerisigut, nukissanik pitsaaneruseumik atuisarnerit qulakkeerneqartarnerisigut, ilisimasanik paarlaasseqatigiittarnikkut, kiisalu nunani tamalaani siulersuinikkut periutsit nukittorsarnerisigut aamma programmitigut paarlaasseqatigiittarnikkut.

WITBN ullumikkut qaammammut akunnerup affaanik tv-kkut aallakaatitassanik tunisassiortarpoq nunanit peqataasunit naatsunik ilangussaqartarnikkut, aammattaaq nutaarsiassatigut paarlaasseqatigiittarsinnaaneq piareersarneqarpoq.

KNR-imiilli aamma erseqqissaatigineqassaaq, programminik paarlaaseqatigiittarnissami naatsorsuutigineqartarmat nutserilluni oqaasertalersuinermut aningaasaliisoqarsimanissaa. Oqaasertalersuisumit ataatsimit sapaatip akunneranik ataatsip missaanik sivisussuseqartarpooq tv-kkut aallakaatitaq minutsinik 45-nik sivisussusilik kalaallisuumut nutsissallugu oqaasertalersussallugulu – soorunami imarisaa apeqqutaatillugu, oqaluinnartut annertuujunersut, aamma imarisaa qanoq annertutigisumik eqikkagaatiginersoq.

Naalakkersuisut isumaqarluartutut isigaat tunisassiornikkut pissutsit aamma Nunani Avannarlerni Killerni filmiliornikkut tv-kkullu aallakaatitassiornikkut suleqatigiissutigineqarsinnaasut pillugit paarlaaseqatigiissinnaajumalluni ataatsimeersuartoqarnissaa, nunanillu avannarlermiunit allanit suleqateqarniarlutik pilersaarusrionerup ingerlariaqqinnissaa pillugu.

Taamaattumik Naalakkersuisunit inassutigineqarpoq, siunnersuut taperserneqassasoq.